



Rapport annual 2011

Conform a sia incumbensa da promoziun ha la QL concedì CHF 11'000.– l'onn da rapport 2011. Sustegni ha ella las suandantas artistas ed ils suandants projects:

- *Claudia Cadruvi*: Il bov da Làvaz, epos en sursilvan/tud./franz./tal. (CHF 1'000.-)
- nova ediziun dal *Lexicon Romontsch Cumperativ* (CHF 2'500.-)
- *Chor viril Surses*: turnea da concerts cun il requiem da Liszt (CHF 500.-)
- fundaziun *Convivenza*, contribuziun a la dieta (CHF 1'000.-)
- *Sara Hermann*: «Paula fliegt», in teater sin via pluriling (CHF 2'000.-)
- *Aline Suter & Céline Carridroit*: «Il Resun», purtretts cinematografics da tschintg Rumantschs (CHF 2'000.-)
- *Dis da litteratura 2011* (CHF 2'000.-)

La radunanza generala dal 2011 ha gì lieu ils 6 d'avrigl en preschientscha da var diesch pertschient dals 346 commembers e fautors da la QL. Suentar la radunanza ha discutà cun il public Peter Haerle, il directur da la partiziun cultura da la citad da Turitg, davart il tema fitg vast **Turitg e la Rumantschia**.

Sut l'affischa **ChantaturAs rumantschAs a Turitg** han concertà ils 14 d'avrigl Bianca Mayer, Bettina Vital, Roland Vöggtli e Pascal Gamboni en il Theater Stadelhofen. L'occurranza reussida ha la QL realisà ensemen cun l'organisaziun da giuventetgna rumantscha GiuRu e l'URB.

En il «Viadukt», il lieu da scuntrada per uffants, ha gì lieu il november l'ultim dals nov **suenthermezdis per famiglias rumantschas** a Turitg. La QL ha inizià questas sentupadas l'onn 2010 ed ha mintgamai surpiglià il tschains dal local per porscher ad uffants pitschens ed ad uffants da scola cun genitur(s) rumantsch(s) in lieu da scuntrada. L'idea da stgaffir ina rait sociala n'ha betg gì il success giavischà. La QL sustegna il project en l'avegnir sulettamain sut la cundiziun che las famiglias adressadas surpiglian atgna iniziativa.

Il 2012 po la QL festivar ses giubileum da 40 onns. En quest connex ha la QL scrit ora la fin dal 2011 in **premi da reconuschientscha per lavurs da matura e da studi** davart la situaziun actuala u davart l'avegnir da la quarta lingua naziunala. La summa dal premi munta a CHF 4000.–.

La **suprastanza da la QL** – Madlaina Peer (co-presidenta), Kaspar Silberschmidt (co-president), dr. Linus Bühler (actuar), Bettina Berther, dr. med. Anna Marie Hew, Barbara Kürz, dr. iur. Roman Truog – ha gì quatter sesidas durant l'onn da rapport (2 da favrer, 4 da matg, 26 d'october e 14 da december). A la radunanza da delegadas e delegads da la Lia Rumantscha 2011 a Glion han Madlaina Peer e Roman Truog represchentà la QL.

Madlaina Peer e Kaspar Silberschmidt